

ХУУЛЬ ЗҮЙ, ДОТООД ХЭРГИЙН САЙД,  
ХӨДӨЛМӨР, НИЙГМИЙН ХАМГААЛЛЫН САЙДЫН  
ХАМТАРСАН ТУШААЛ

2017 оны 03 дугаар  
сарын 13-ны өдөр

Дугаар А/56 А/55

Улаанбаатар  
хот

Журам батлах тухай

Гэр бүлийн хүчирхийлэлтэй тэмцэх тухай хуулийн 43 дугаар зүйлийн 43.7 дахь хэсгийг үндэслэн ТУШААХ нь:


1. “Хохирогчийг хүчирхийлэл үйлдэгчтэй уулзуулах уулзалтыг зохион байгуулах журам”-ыг нэгдүгээр, “Хохирогчийг хүчирхийлэл үйлдэгчтэй уулзуулах уулзалтын бүртгэлийн маяг”-ыг хоёрдугаар хавсралт ёсоор тус тус баталсугай.

2. Журмын хэрэгжилтийг хангаж ажиллахыг Цагдаагийн ерөнхий газрын дарга /Тэргүүн комиссар Ө.Энхтөр/, Гэр бүл, хүүхэд, залуучуудын хөгжлийн газрын дарга /О.Алтансүх/ нарт үүрэг болгосугай.


3. Тушаалын хэрэгжилтэд хяналт тавьж ажиллахыг Хууль зүй, дотоод хэргийн яамны Бодлогын хэрэгжилтийг зохицуулах газар /Э.Энхтуяа/, Хөдөлмөр, нийгмийн хамгааллын яамны Хүн амын хөгжлийн газар /С.Тунгалагтамир/ нарт тус тус даалгасугай.

ХУУЛЬ ЗҮЙ, ДОТООД  
ХЭРГИЙН САЙД  
С.БЯМБАЦОГТ

ХӨДӨЛМӨР, НИЙГМИЙН  
ХАМГААЛЛЫН САЙД  
Н.НОМТОЙБАЯР



Хууль зүй, дотоод хэргийн сайд, Хөдөлмөр, нийгмийн хамгааллын сайдын хамтарсан 2017 оны 03 сарын 13 -ны өдрийн А.56...А/35 дугаар тушаалын нэгдүгээр хавсралт



## ХОХИРОГЧИЙГ ХҮЧИРХИЙЛЭЛ ҮЙЛДЭГЧТЭЙ УУЛЗУУЛАХ УУЛЗАЛТЫГ ЗОХИОН БАЙГУУЛАХ ЖУРАМ

### Нэг.Нийтлэг үндэслэл

1.1.Энэхүү журмаар Гэр бүлийн хүчирхийлэлтэй тэмцэх тухай хуулийн 30 дугаар зүйлийн 30.1, болон 33 дугаар зүйлийн 33.1.1, 34 дүгээр зүйлийн 34.1-д заасны дагуу аюулгүй байдлын болон түр хамгаалалтад байгаа хохирогч, түүний хүүхэд, гэр бүлийн бусад гишүүдийг хүчирхийлэл үйлдэгчтэй уулзах харилцааг зохицуулна.

1.2.Аюулгүй байдлын болон түр хамгаалалтад байгаа хохирогч, түүний хүүхэд, гэр бүлийн бусад гишүүд нь хүчирхийлэл үйлдэгчтэй уулзах талаарх хүсэлт, зөвшөөрлийг Гэр бүлийн хүчирхийлэлтэй тэмцэх тухай хуулийн 43 дугаар зүйлийн 43.1-43.4 дэх хэсэгт заасны дагуу гарган шийдвэрлэнэ.

### Хоёр.Уулзалт зохион байгуулах

2.1.Уулзалтыг Гэр бүлийн хүчирхийлэлтэй тэмцэх тухай хуулийн 43 дугаар зүйлийн 43.6-д заасны дагуу баг, хороо, сумын нийгмийн ажилтан зохион байгуулж, аюулгүй байдлыг цагдаагийн байгууллага хариуцна.

2.2.Уулзалтын зөвшөөрлийг бичгээр үйлдэж, хамтарсан багийн гишүүд гарын үсэг зурж баталгаажуулан, үйлчлүүлэгчийн хувийн хэрэгт хавсаргана.

2.3.Хамтарсан баг нь уулзалт болох газар, хугацааг товлож, хохирогч болон түр хамгаалалтын үйлчилгээ үзүүлж байгаа байгууллага, хүчирхийлэл үйлдэгчид ажлын 1-2 хоногийн өмнө мэдэгдэнэ.

2.4.Уулзалт зохион байгуулсан, оролцсон ажилтнууд уулзалтын талаархи мэдээллийн нууцлалыг хамгаална.

2.5.Уулзалтад оролцож байгаа оролцогчид эрх бүхий ажилтны хууль ёсны шаардлагыг биелүүлнэ.

2.6.Хохирогчийг хүчирхийлэл үйлдэгчтэй уулзуулах нэг удаагийн уулзалтын хугацааг 60 минутаас хэтрүүлэхгүй байхаар зохион байгуулна.

2.7.Уулзалтыг хохирогчид түр хамгаалалтын үйлчилгээ үзүүлж байгаа байгууллага, газраас бусад холбогдох байгууллагад зохион байгуулна.

2.8.Уулзалтыг зохион байгуулж байгаа байр нь дуу чимээнээс тусгаарласан, камерын хяналттай, оролцогчийн аюулгүй байдлыг хангасан байна.

2.9.Шаардлагатай гэж үзвэл уулзалтын үеийн аюулгүй байдлын хяналтыг цагдаагийн ажилтан биечлэн хэрэгжүүлж болно.

2.10.Хяналтын камерын болон дууны бичлэгийг 30 хоногоос доошгүй хугацаанд уулзалтын аюулгүй байдлыг хариуцсан цагдаагийн байгууллага

хадгалж, шаардлагатай тохиолдолд хууль хяналтын байгууллагад мэдээллийг саадгүй гаргаж өгнө.

2.11.Уулзалт зохион байгуулсан ажилтан хавсралтаар баталсан "Хохирогчийг хүчирхийлэл үйлдэгчтэй уулзуулах уулзалтын бүртгэлийн маягт"-ын дагуу бүртгэл хөтөлж хамтарсан баг, түр хамгаалалтын үйлчилгээ үзүүлж байгаа байгууллагад хүргүүлнэ.

2.12.Гэр бүлийн хүчирхийлэлтэй тэмцэх тухай хуулийн 43 дугаар зүйлийн 43.5-д заасан тохиолдолд хохирогч, түүний хүүхдийг хүчирхийлэл үйлдэгчтэй уулзуулахыг хориглох бөгөөд энэ талаар тэмдэглэлд тусгана.

2.13.Хүчирхийлэл үйлдэгч нь согтуурсан буюу мансуурсан байдалтай тохиолдолд уулзалтыг зохион байгуулахаас татгалзана.

2.14.Уулзалтын явцад дараахь нөхцөл байдал үүсвэл шууд зогсооно:

2.14.1.Уулзалтын эхлэл болон явцад хохирогч уулзалтыг цааш үргэлжүүлэхээс татгалзсан;

2.14.2.Хүчирхийлэл үйлдэгч нь хохирогчийг айлган сүрдүүлж, хүч хэрэглэхээр заналхийлсэн;

2.14.3.Хүчирхийлэл үйлдэгч хохирогчийг өөрт ашигтай шийдвэр гаргуулахаар тулган шаардсан;

2.14.4.Хүчирхийлэл үйлдэгч уулзалт зохион байгуулж байгаа ажилтны хууль ёсны шаардлагыг биелүүлэхээс татгалзсан бол.

2.15.Уулзалтад оролцох хохирогч болон хүчирхийлэгч үйлдэгчийн биед цагдаагийн алба хаагч үзлэг хийж, сэжигтэй зүйл илэрвэл нэвтрүүлэхээс татгалзаж тэмдэглэлд тусгана.

2.16.Хохирогчийг уулзалт зохион байгуулах байранд хүргэх, буцаах үеийн аюулгүй байдлыг цагдаагийн байгууллага хариуцна.



Хууль зүй, дотоод хэргийн сайд, Хөдөлмөр, нийгмийн хамгааллын сайдын хамтарсан 2017 оны 03 сарын 13 ны өдрийн ..... А/56..... А/35... дугаар тушаалын хоёрдугаар хавсралт

**ХОХИРОГЧИЙГ ХҮЧИРХИЙЛЭЛ ҮЙЛДЭГЧТЭЙ  
УУЛЗУУЛАХ УУЛЗАЛТЫН БҮРТГЭЛ**

Уулзалт зохион байгуулж буй байгууллага	..... байгууллага, газар, хэлтсийн ..... албан тушаалтай, ..... овогтой .....
Уулзалт эхэлсэн огноо, газар	.....он..... сар .... өдөр . ...цаг... минут ..... аймаг, дүүрэг
Хүчирхийллийн хохирогч	..... овог ..... нэр .....регистр . . . . . нас . . . . . хүйс
Хүчирхийлэл үйлдэгч	..... овог ..... нэр .....регистр . . . . . нас . . . . . хүйс
Уулзалтыг зөвшөөрсөн албан тушаалтан нэр..... хаяг: .....	Зөвшөөрлийн хуудасны дугаар: .....
Уулзалтын тэмдэглэл (уулзалтын явц, нөхцөл байдлын талаар тусгана.)	
.....	
.....	
.....	
.....	
.....	
.....	
Хяналт тавьсан цагдаагийн алба хаагч	..... байгууллага, газар, хэлтсийн ..... цолтой . . . . ..... албан тушаалтай, ..... ..... овогтой .....
Уулзалтад байлцсан: нийгмийн ажилтан	..... байгууллага, газар, хэлтсийн ..... албан тушаалтай, ..... овогтой . . ...../гарын үсэг/
Уулзалтад байлцсан бусад хүн	.....
Уулзалт дууссан цаг	.....он..... сар .... өдөр . ...цаг... минут
Уулзалтын тэмдэглэл хөтлөсөн ажилтан	..... нэр /гарын үсэг/